


Seni Preseten Thomas S. Monson



## Sia Monata?

**N**on ewe neni ngang ua nonnom o ngang non me nom, ewe Mwichefen a fori eu nenien foneni chuko, ekkewe chon ngang ir chon ekkewe wart mei ikkeweia ren ar pwisin asora ar fansoun. Fan chommong ei neni mi kan angangoch, pwe a awora ngeni ewe nenien isoisin pisop fite ngoroun sokkun me fitepu-kun paun chuko mi fen monata ne kuku. Nge, fan ekkoch, an emon epwe emon chon aninis ese chok wewen pwe epwe wor pwoi won ekkewe pau nge a pwan tufich pwe epwe wor osukosuk non netip me non mukur.

Awewe, ua chemeni non eu fansoun am aua ionifengeni ekkewe anuon a wor rer ewe Pristut seni Aaron pwe repwe nimeti ewe nenien foneni chuko. Am ei mwich mi kan pwapwa me mwetures aua chufengen non ewe neni me aua muttir ne angei, ioni, me keni chommong ekkewe fetin me piingau. Seni saramen ekkewe ekkei, am aua mongo hot dog me aua apasa am kapasen ingeiti ngeni emon me emon neim ren met au fori.

Nge, a chok wor eu osukosuk mi watte a fis. Pun aua akurang me pokiten ekkewe ekkei, ekkewe nimu ngorou chuko ra niuokus, iwe rese awora sokkun. Seni fansoun ano aua mwutata pwe epwe wor ekkis fetin fan itan ekkewe chuko repwe tufichin awora sokkun.

Ese wor emon chon ewe Mwichefen mi awora aninis fan itan ekkewe mi woungau epwe menuki are amam ewe angangen aninis. Angang, tumunun moni, anongonong pwisin woch, me aninis fengen rese minafo ngeni kich.

Sipwe chechemeni pwe ekkewe nenien isois mi nap epwe chok eu me eu famini non ewe Mwichefen epwe wor rer ar isoisin mongo, uf, me, ika mi tufich, ekkewe ekkoch pisekin manau. Nenien ewe Samon nenien isois mi for seni ewe fansoun, nipwakoch, kirekiroch, pisek mi epinipin, me moni seni ekkewe chon Mwichefen mi nukuchar. Ekkei mi kawor ngeni ewe pisop ne anisi ekkewe mi woungau.

Aua pesei meinsin ekkewe Aramas mi Pin non Fansoun Soponon ar repwe tipachem non ar kewe kokkot, repwe tumunu ifa usun ra manaueni manauer, me resap awora eu niwinimang mi watte. Chommong aramas repwe tufichin engino non ekkewe fansoun osukosuken moni ika a chok wor nenier nenien isoisin mongo me uf me ika ese wor ar niwinimang. Ikenai sia kuna pwe chommong ra fori ponuan ei kapasen aurur: a wor ar niwinimang nge ese wor aner mongo.

Ua apasa sefan pwe met ewe Aewin Presetensi ra apasa non ekkewe ekkoch ier a no:

“Ekkewe Aramas mi Pin non Fansoun Soponon ra angei kapasen aurur fan chommong ier pwe ar repwe monata fan itan osukosuk ren ar repwe isoni ekkis seni nour moni. Ren an emon epwe fori ei epwe fokkun apochokuna ach epet me pwapwa. A wor wisan famini meinsin ar repwe pwisin apwonueta met mi namwot ngenir ren ukukun ra tufich ngeni.

“Aua peseikemi ese nifinifin ia oua nom ia won unusen fonufan pwe oupwe ammonata fan itan osukosuk ren ami

oupwe tumunu me isoni moni fan itan osukosuk. Aua peseikemi pwe oupwe tumunuoch non ami kamo; nemeni ami kewe mochenin kamo pwe ousap nom fan nemenien niwinimang. Oune muttir ne moni ami kewe niwinimang, pwe ousap nom fan nemenien. Isoni ekkis moni pwe epwe wor non fansounen osukosuk.”<sup>1</sup>

Sia fen ammonata ngeni ekkewe fansoun osukosuk non manauach? Sia apochokuna ach kewe nipwakoch? Sia fen ammonata fan itan ekkewe fansoun epwe tori kich? Kich mi fen ammonata ach kewe mettoch fan itan ekkewe fansoun osukosuk? Kich mi anneasochisi ekkewe annukun Kot? Sia etiwa afanafanen ekkewe soufos? Sia ammonata ne awora ach pisek ngeni ekkewe mi osupwang, ngeni ekkewe mi woungau? Sia ammonata ne churi ewe Samon?

Sia manau non ekkei ran mi osukosuk. Fan chommong sise sinei met epwe fis; ina minne, mi namwot ngenikich pwe sipwe ammonata fan itan osukosuk. Nupwen ewe fansounen finata a war, ewe fansoun ammon a fen nuno.

#### ESINESIN

1. Ewe Aewin Presetensi, *All Is Safely Gathered In: Family Finances* (pamphlet, 2007).

### AFANAFAN SENI EI POROUS

Ekieki usun met mi namwot ngeni ekkewe ka churi, me ekieki ifa usun ka tongeni anisir pwe repwe anongonong won pwisin ar tufich non pekin angang, moni, mingo, are non pekin ammonata fan itan fansoun osukosuk. Ekieki usun eu me nein om kewe nipwakoch ka tongeni pwari ngenir, usun atake are tumunu moni, epwe apochokuner ne anneasochisi aururun Preseten Monson.

## SERAFO

### Ua Angang Sefan

Seni Jaíne Araújo

**E**u ran, mwirin ua keran wes ne fiti eu angangen anisi ekkoch, ua fetan kan ngeni imwamewe imwen fan

me ua kuna ruemon fefin me ra chok nimeti ewe imw. Ua chok apasa non mecheres: “Pwi kewe, oua mochen aninis?” Emon neir a emenimen ngeniei o a apasa pwe ua saroch ne wareitir pun ir chok mi nimeti ewe imw me ra kan pekus. A apasa pwe a iotek pwe ewe Samon epwe tinano emon ne anisi i. Ua kan pwapwa ne ponueni an iotek. Ua keran wes ne anisi emon me ua kan pekus, nge ua fori mochenin netipei me ua anisi pwan ekkoch.

Mi annuk pwe sipwe angang non pwapwa (see D&C 24:7). Nupwen a wor ach mochen ne anisi ekkoch fansoun meinisin, sia tongeni anisi pwe ekkewe manaman repwe fisita non manuan ekkei ekkoch. Ach anisi ekkoch mi anapano manauach. Ewe Samon mi wesewesen tongeikich, A kan anisi emon me emon Noun kewe, me Epwe ngenikich ewe pochokun ne anisi ekkoch.

*Ewe chon makk mi nom Rio Grande do Norte, Brazil.*

## SEMIRIT

### Oua Monata?

Ekkewe Ponu: Pung, Pung, Mwan, Pung, Mwan

**P**reseten Monson a tingoreikich pwe sipwe ammonata fan itan ekkewe fansounen weires me sipwe pwan anisi ekkoch non ar kewe fansounen weires. Kopwe mina ei tes ne kuna ika ka monata!

Mi tufich fansoun meinisin upwe kuna emon mi tongeni anisie. Pung  Mwan

Mi tufich ai upwe kinisou fan itan ekkewe mettoch a wor rei iei. Pung  Mwan

Ese wor ai feioch o nipwakoch upwe pwari ngeni ekkoch. Pung  Mwan

Mi kan tipachem ai upwe isoni moni fan itan fansounen osukosuk. Pung  Mwan

Mi namwot upwe angei ekkewe nios are uf minafo pwe upwe pwapwa. Pung  Mwan



# Ewe Popun mi Pin an Jises Kraist: Chon Aururu

*Anneaochu me ikiotek usun ekkei mettoch me kutta met kopwe aporaus. Ifa usun om weweiti usun manauan me angangen ewe Chon Amanau epwe tongeni anapano om nuku non I me efeiochu ekkewe aramas ka kan tumunu non om angangen an fefin chon amwa? Ren pwan och poraus, kopwe nengeni reliefsociety.lds.org.*

**Nuku, Famini, Aninnis**

*Tei eu kinikin non fitu seni Poraus seni An Fefin Chon Amwa mi porausen kinikinin angangen ewe Chon Amanau.*

**J**ises Kraist a pwon, “Usap nikiti-kemino, nge upwe pwan niwinsefaniti kemi.” (John 14:18). Epwe wano “pwapwa me meseik nge esap noninen” (Isaiah 61:3). Pokiten Kraist a riaffou ren an ewe Achasefan fan itach, Esap menukicheno. Linda S. Reeves, ewe Oruan Chon Aninis non ewe presetensi an ewe Mwichen Fin Anisi Unusan, a apasa, “Ach Chon Amanau mi pwisin angei won . . . ach kewe riaffou me ach netipechou me osukosuk pwe epwe tongeni sinei met sia mefi me ifa usun epwe echipa kich.”<sup>1</sup>

Ach sinei pwe Kraist epwe echipa kich mi tongeni wato rech kinamwe me pwari ngenikich ach sipwe tapweno Ach nenien appiru nono ach anisi ekkoch. Preseten Thomas S. Monson a apasa: “Ach sinei usun ewe kapas allim me ach tong ngeni Semach won Nang me ach Chon Amanau epwe wato rech kinamwe me apochokuna kich me wato rech pwapwa non netipach ika sipwe

wenechar non ach anneasochisi ekkewe annuk. Ese wor eu mettoch won ei fonufan epwe tufichin akuffu kich.”<sup>2</sup>

## **Seni ekkewe Pukfel**

John 14:18, 23; Alma 7:11–13; Doctrine and Covenants 101:14–16

## **Seni Ach Uruo**

Elaine L. Jack, ewe engon me oruan presetenin Fin Anisi Unusan, a apasa: “Non ach angangen churi ren osukun sia aninifengen emon me emon neich. Ach kewe foffor mi tongeni pwari met ach kapas rese tufichin pwari. Ach kirekiroch mi pwari chommong usuch. Ach takirikir fengen mi apochokunafengeni kich. Eu fansoun aninifengen mi apochokuna ngunuch kewe. Sisap tongeni mwarei osukosuken emon mi netipechou fansoun meinisin, nge sia tongeni apochukuna i pwe epwe tufichin mwareiochu pwisin an osukosuk.”<sup>3</sup>

Pwich kewe Fin Anisi me nom ra “kuna pochokun non pekin ngun non ar tongfengen me kirekiroch

ngeni emon me emon neir. . . . Non ar riaffou pokiten ekkewe weiresin semwen me mano, ir ra iotek non nuku fan itan emon me emon neir me ra awora kinamwe nefinen emon me emon neir. Helen Mar Whitney a makk, ‘ewe tongen Kot mi chou fetan ngeni emon me emon neich, tori ewe emon mi unusen ngau ese wor pochokun non an angang ne uta nefinen kich me ewe Samon, me an kewe sossot mi efeiengau, fan ekkoch, ir rese awora riaffou.’<sup>4</sup>

## **ESINESIN**

1. Linda S. Reeves, “The Lord Has Not Forgotten You,” *Ensign or Liahona*, Nov. 2012, 120.
2. Thomas S. Monson, “Be of Good Cheer,” *Ensign or Liahona*, May 2009, 92.
3. Elaine L. Jack, in *Daughters in My Kingdom: The History and Work of Relief Society* (2011), 119.
4. *Daughters in My Kingdom*, 34.

## **Ekkieki Usun Ei**

Ifa usun ach weweiti pwe ewe Samon a chechemeni kich mi tongeni wato rech kinamwe?